

SOGN OG FJORDANE RAUD VALALLIANSE

KORTVERSJON AV FYLKESPROGRAM 1999

1. MED FOLKET - MOT MAKTA !

RV er eit sosialistisk parti. RV er for eit fleirpartisystem med ytringsfridom og eit demokrati der fleirtalet bestemmer. I dagens system dominerer dei som eig kapitalen. Deira rettesnor er profitten, og ikkje omsynet til menneske, miljø og fellesskap.

RV er også eit revolusjonært parti. Så lenge borgarskapet, dei som eig kapitalen, opprettheld si makt, kan ikkje RV sin måte å organisere samfunnet på verte realisert.

Ein overgang til eit sosialistisk samfunnssystem vil vere mogleg når folkefleirtalet ønskjer det. Eit slikt systemskifte kan gå fredeleg føre seg dersom borgarskapet godtek demokratiske spelereglar. RV forsvargar folkefleirtalet sin rett til også med valdelege middel å stanse borgarskapet sitt valdsapparat i ein situasjon der fleirtalet ønskjer ei sosialistisk samfunnsendring.

INNHALD I DEMOKRATIET

RV vil styrkje den folkevalde makta. RV er mot nedskjering i talet på representantar i kommunestyre og fylkesting. RV er mot styrkinga av heildagspolitikarar i desse systema. RV stør rettane folk har gjennom offentlegheitslova og ser med bekymring på framlagde EU- direktiv som vil undergrave/ svekkje den. Makta i kommunestyre, fylkesting og Storting vert no særleg undergraven gjennom EU/ EØS- systemet.

2. KOMMUNAL ØKONOMI

STEINRIK STAT - GJELDSTYNGDE FYLKE/ KOMMUNAR

På Stortinget vedtek eit klart fleirtal slike økonomiske rammer at dei økonomiske vanskane i fylka/ kommunane veks. RV går inn for ein kraftig auke i inntektene til fylka og kommunane. Ein større del av verdiskapinga må gå til offentleg sektor. Den offentlege forvaltninga i Noreg har fått ein mindre og mindre del av brutto nasjonalproduktet : 1992 - 52%, 1995 - 47,7 % og 1998 - 43 % (gjennomsnitt for EU 1997 - 48 %).

OPPSAMLING AV RIKDOM HJÅ STATEN OG PRIVAT STORKAPTAL

Dei 100 rikaste auka den bokførte eiga si frå 60 - 70 milliardar i 1990 - 1993 til 139 milliardar i 1998. Storparten av auken tek dei ut som aksjeutbyte. Staten har i 1999 520 - 530 milliardar i nettofordringar. Berre oljefondet er venta å auke med 63 milliardar i 1999. (Men fylka og kommunane har i 1999 40- 45 milliardar i nettogjeld.)

RV vil skattleggje kapitalinntekter etter same satsar som arbeidsinntekter.

Det vil gje 40 milliardar som kan brukast i offentleg sektor.

RV vil redusere skattar og avgifter som rammar breitt og ugradert, og vil til dømes ha vekk eigendelar på ymse tenester folk treng, så som heimehjelp og legekonsultasjonar.

3. EØS - AVTALEN SVEKKJER DISTRIKTS- NOREG

EU-tilpasninga har ført til eit sterkt åtak på distrikts- Noreg. EØS- avtalen, EU- medlemskap og tilpasning til GATT sine reglar for fri omsetnad av jordbruksprodukt vil aksellerere svekkinga av distrikta. EØS gjer differensiert arbeidsgjevaravgift som distriktspolitisk virkemiddel ulovleg. Det er ein føresetnad for å kunne føre ein nasjonal økonomisk politikk med eit mål om eit livskraftig distrikts- Noreg at vi held oss utanfor EU og melder oss ut av EØS. EU/ EØS overfører vedtaksrett frå Stortinget til Bryssel, med eit byråkratisk og politisk system som er mykje lettare å påvirke/ presse for storkapitalen sine lobbyistar enn for folkelege organisasjonar. EU/ EØS svekkjer det norske demokratiet.

EU er eit dårleg system for folkefleirtalet også i EU- landa.

RV stør difor samarbeid med EU-motstandarar også i EU-landa, og driv sjølv slikt arbeid.

STOPP AVFOLKINGA - FOR EIT LIVSKRAFTIG DISTRIKTS- NOREG

Distrikta må behalde ein større del av verdiskapinga og såleis få eit sterkare økonomisk grunnlag for busetjinga der. Sterke lokalsamfunn der folk har kontroll over ressursane og verdiskapinga, er også den beste garantien mot miljørasering, og for eit demokrati der folk har makt over sitt eige liv.

RV er for politisk styring med posten - og imot nedlegging av postkontor.

4. SKULE OG UTDANNING

Lik rett til utdanning er eit hovudprinsipp for RV. Reform 94 gjev 16-19 åringar rett til vidaregåande skule. Også eldre ungdomar og vaksne må få same retten. Talet på elevplassar i vidaregåande skule må aukast slik at det er plass til alle.

Store kostnader med læremiddel undergrev lik rett til utdanning. RV er for **gratis lærebøker og andre læremiddel**. RV seier nei til **utlånsordning** for lærebøker. Ei utlånsordning kan gjere det vanskeleg å få oppdaterte bøker, slik vi ser i grunnskulen, og kan undergrave bokhandlar, særleg i distrikta. Stipend må dekkje fullt ut kostnader med lærebøker og naudsynt utstyr (utstyr gjeld særleg yrkesfaglege elevar) **for alle elevar** - utan noka **behovsprøving** opp mot til dømes foreldreøkonomi. RV er imot reklamesponsing/ **reklamefinansiering** av skulebøker.

All skuleskyss skal vere gratis . Elevar i vidaregåande skule betaler **kopiavgifter** for kopiar som vert klassifiserte som læremiddel. RV vil ta bort desse kopiavgiftene.

IKT (informasjons- og kommunikasjonsteknologi) skal integrerast som arbeidsreiskap i alle fag. Dette krev utstyr i alle klasserom. Skulen må særleg leggje vekt på å utvikle IKT-bruken slik at jenter tek IKT i bruk i same grad som gutar.

Den vidaregåande skulen må styrkjast vesentleg slik at den kan bli den viktigaste delen i **vaksenopplæringa**. Skulane må bli kompetanse- og ressurscenter for så vel det private næringslivet som for offentleg sektor.

RV vil ha auka satsing på **etter- og vidareutdanning for lærarar**.

Biblioteka må styrkjast og utbyggjast med IKT- utstyr og IKT- kompetanse til å kunne fungere som servicesenter for skuleverk - og for einskildpersonar og organisasjonar.

5. VELFERD

RV krev 6-timars normalarbeidsdag - med full lønskompensasjon.

Dette vil redusere arbeidsløysa, gjere livet lettare for deltidsarbeidande og lette stresset for mange folk. Særleg mange kvinner arbeider deltid. 6-timarsdagen vil styrkje kvinner i arbeidsmarknaden, vil styrkje pensjonsrettane deira og likestillinga i arbeidslivet. Og det vil gje mange auka overskot til å delta meir aktivt i kulturliv, idrett og politikk.

HELSE OG SOSIALPOLITIKK

Berande prinsipp for RV er lik rett og tilgang til sosial tryggleik for alle uavhengig av bakgrunn, bustad, etnisitet og kjønn. Det krev at det offentlege eig og styrer dei sentrale velferdsordningane. Helse- og sosialtenester skal vere gratis - vekk med eigendeler.

MOT RUSMISBRUK OG RUSMIDDELSKADAR

Folk som rusar seg for å kome bort frå problema sine, gjer ikkje opprør mot det som skaper problema. Både den legale og den illegale ruskapitalen tener godt på å auke rusbruken i folket, men rusmiddelbruken påfører samfunnet og enkeltpersonar store problem.

RV står ut frå dette ein restriktiv alkoholpolitikk/ rusmiddelpolitikk, og RV kjempar mot legalisering av narkotiske stoff. RV vil styrkje førbyggjande arbeid ; som å arbeide for gode oppvekts- og livsvilkår.

6. PRIVATISERING

Kampen mot privatisering og konkurranseutsetjing - uansett tenestoområde - er eit forsvar for **velferdsstaten, for rettferdig fordeling**. Med offentlig drift kan folk presse politikarane med krav om kvalitet på tenestene og krav om gode arbeidsvilkår for tilsette.

Mange kvinner arbeider i offentlig sektor. Om vi får ei svekking eller ei utbygging av dei offentlege sektorane er difor ekstra viktig for kvinnene. RV er for ei vidare utbygging.

RV vil tilføre midlar/ satse på **utvikling, kvalitetssikring og effektivisering** av drifta i offentlig sektor. Samfunnsendinga krev ein betre offentlig sektor.

Fellesskapet har spart opp store verdiar gjennom eige av **kraftverk/ energiverk**. Dette er evigvarande pengemaskinar. RV avviser sal av desse økonomiske godbitane til private interesser.

7. EIT ØKOLOGISK OG STERKT NORSK LANDBRUK

Bønder opplever nedgang i arbeidsinntekter og sakkar økonomisk etter andre yrkesgrupper. Dette svekkjer bygde- Noreg. Landbruket i Sogn og Fjordane er eit småskalalandbruk. Stønadsordningar må fremje kombinasjonsdrift. Det må skapast eit økologisk landbruk som tek vare på og nyar opp att jorda, og ikkje forgiftar verken jorda eller maten. Landbruket må leggjast om til produksjon med mindre bruk av kunstgjødsel, kraftfor og antibiotika. RV vil auka støtta til omlegging til økologisk drift.

Landbruket er viktig som grunnlag for busetjing i heile fylket.

RV er imot å auke konsesjonsgrensa frå noverande grense, 5 mål. Buplikta må ikkje rørast. Fritt sal utan bu- og driveplikt vil føre mange små gardar over til feriestader for kjøpesterke grupper. Sal av jordbrukseigedomar må vere innretta på å sikre busetjing på bruket og i lokalsamfunnet.

8. FORSVAR EINSIDIGE INDUSTRISTADER

Ein stor del av industrisysseletjinga i Sogn og Fjordane er knytt til den kraftkrevjande industrien i Høyanger, Svelgen og Årdal. Eigarane, Hydro og Elkem, tel på knappane om desse industristadene skal satsast på. Grunngevinga er kraftmangel og kraftprisar. Reell bakgrunn er at utanlandsinvesteringar er meir profitabelt.

RV krev at Hydro og Elkem sikrar arbeidsplassane i Høyanger, Svelgen og Årdal. Styresmaktene må tildele naudsynt fornybar kraft til prisar tilsvarande det konkurentane har. Mykje av krafttildelinga kan skje gjennom ENØK i den norske energiforsyninga og i verksemdene sjølve. Det må satsast på auka foredling i Noreg av råvarene frå desse verksemdene.

9. PÅ LAG MED NATUREN

RV kjempar for eit samfunnssystem grunnlagt på økologisk forsvarleg forvaltning/ bruk av naturressursane. Det biologiske mangfaldet og livsgrunnlaget for framtidens generasjonar må sikrast. I dette samfunnet er dei viktigaste produksjonsmidla underlagt demokratisk styring. Det materielle forbruket i den rike verda må reduserast drastisk. RV vil redusere olje- og gassproduksjonen.

10. MOT ALL RASISME - FOR EIT FLEIRKULT. SAMFUNN

RV er eit anti-rasistisk parti. Det skal vere full religionsfridom og meningsfridom. Innvandringsstoppen må opphevast. Noreg må godkjenne eit utvida flyktningeomgrep, som også omfattar økonomiske, økologiske og religiøse flyktningar, og dei som vert forfølgde på nasjonalt grunnlag eller på grunn av etnisk reinsing.

11. FOR INTERNASJONAL SOLIDARITET OG FRIGJERING

RV stør kampane mange folk fører kring i verda for demokrati, miljø og sosial rettferd for folkemassane.

Alle nasjonar har same rett som vi til nasjonalt sjølvstyre, og til å velje korleis dei skal organisere sitt politiske system.

RV stør folk som reiser seg mot nasjonal undertrykking.

Det er viktig for folk også i Sogn og Fjordane korleis norske økonomiske interesser oppfører seg kring i verda. Den norske staten og norske storselskap investerer i aukande grad i utnytting av arbeidskraft og naturressursar i andre land. RV stør kampane folk i desse landa reiser for skikkelege løns- og arbeidsvilkår, og for at utanlandske investeringar skal ta omsyn til naturen etter same strenge retningslinjer som vi har i Noreg.

Vil du sjå på heile fylkesprogrammet, kan du hente det på adresse :

<http://m1.2577.telia.com/~u257700599/rvsf.htm>
(legg merke til m1 (ein), ikkje ml)

Der finn du også linkar til ulike RV-adresser.

RV sentralt har adressa : www.rv.no